



«Ես միշտ իմ ուշադրության կենտրոնում եմ պահել մատաղ սերնդի կրթության, դաստիարակության հարցը և իմ աշխատանքի ընթացքում առանձնակի ուշադրություն եմ դարձնում սպորտի, մշակույթի, հոգևոր կյանքի զարգացմանը»- բոլոր հանդիպումների ընթացքում այս մասին նշում և կարևորում է Բյուրեղավան, Նուռնուս, Զրաբեր միավորվող համայնքների ղեկավարի միակ թեկնածու, Բյուրեղավանի գործող քաղաքապետ Հակոբ Բալասյանը: Թեկնածուի քարոզարշավը շարունակվում է: Այս անգամ հանդիպումը Բյուրեղավանի արհեստագործական ուսումնարանի և քաղաքային պոլիկլինիկայի աշխատակիցների հետ էր: Կոլեկտիվների հետ հանդիպման ընթացքում թեկնածուն խոսեց իր առաջիկա ծրագրերի ու անելիքների մասին: «Իսկապես, համակարգային շատ հարցեր են լուծվել»-ասում է Հակոբ Բալասյանը, անցնելով արդեն ծրագրային դրույթներին, ինչը մանրամասն ներկայացված է նաև նրա նախընտրական բուկլետում: «Եկել եմ երկու խնդրանքով՝ ակնկալում եմ ձեր ակտիվ մասնակցությունը նոյեմբերի 5-ին կայանալիք ընտրություններին, և ավագանի ընտրելու հարցին հորդորում եմ ճիշտ մոտենալ՝ ձեր ձայնը տալով ավելի կիրթ ու համայնքի համար մտահոգ թեկնածուի»-նշեց Հակոբ Բալասյանը: Արհեստագործական ուսումնարանի տնօրեն Լաուրա Մարտիրոսյանը վստահեցրեց, որ իր և կոլեկտիվի աջակցությունն անպայման կլինի. «Պարոն Բալասյան, նկատելի են այն աշխատանքները, որոնք արվել են տարիների ընթացքում: Ես բնակվում եմ Երևանում: Ուզում եմ նշել մի փոքր, բայց շատ կարևոր փաստ: Չմռան ամիսներին, երբ համեմատում եմ մեր թաղի և այստեղի ձնամաքման աշխատանքները, տեսանելի երևում է Բյուրեղավանի առավելությունը: Իրոք, խոսքեր չկան, աշխատանքները հոյակապ են կատարվում: Այնպես որ, մենք Ձեր կողքին ենք»: Բյուրեղավանի քաղաքային պոլիկլինիկայի տնօրեն Միքայել Միքայելյանը վստահեցրեց, որ իր կոլեկտիվը մասնակցելու է ընտրություններին. «Վստահեցնում եմ, որ մեր քաղաքացիները Ձեր հանդեպ լցված են հավատով ու հույսով: Ձեր ղեկավարության տարիներին Բյուրեղավան համայնքը էլ ավելի կգեղեցկանա և բյուրեղյա մաքրությամբ կներկայանա մեր հանրապետությանը»:

27.10.17